



*Kamis, 31 Oktober 2024*  
**Ogen : Roma 1:16-17**



**Kiniteken Si Nggeluh**



**I**tengah-tengah Gereja protestan, tanggal 31 Oktober iperingeti jadi wari reformasi. Benana enda tubuh arah sekalak tokoh si tergelar Martin Luther. Pemetehna kerna Pustaka si Badia tupung si e, njemba ia guna nuliskan piga-piga pemahamen si berbeda ras kai siniajarken Gereja. Tulisenna e itempelken i bas pintu Gereja, si jadi pusat perjumpaan perpulungen ras masyarakat. Kai si ibahanna e mereken pengertin si mbaru man si ngogesa, e maka turah penulaken nandangi ajaren-ajaren Gereja si sedekah enda erbahanca lit pengelompoken entah golongan-golongan i bas anggota perpulungen. Erpalasken Roma 1:16-17, ituriken maka Berita Si Meriah e me si maba keselamatan, labo arah nukur surat pengalemi dosa. Sedekah enda idayaken Gereja surat pengalemi dosa maka keselamatan e jadi adi dosa ialemi arah nukur surat si ilitken Gereja.

Bagi siakuken Paulus, maka berita si meriah e mpetangkas uga Dibata ngerembakken diriNa kempak manusia, ibenai alu kiniteken janah idungi alu kiniteken. Kalak si enggo iperembakken ras Dibata arah kinitekenna ndatken kegeluhen kap. Labo arah perbahanen, tapi arah kiniteken man Dibata. Kiniteken turah arah megiken Kata Dibata dengen ngukurisa alu mbages. Adi bage ibabai me perpulungen guna ngoge pustaka, sabap arah si e nari mbelin kal jadi perubahen geluh; mereken pengertin kerna sura-sura Dibata bage pe mpebelin kiniteken. Jadi, bahanlah geluhta tetap ipelambarui Kata Dibata seh maka reh bagesna kiniteken reh paguhna kegeluhen. Ogelah pustaka, sabap i je Dibata ngerana mpelambarui kiniteken, seh maka reh pangna kita naksiken kerna Dibata nandangi enterem jelma. Reformasi e jadi i bas pusuh nari.